

《大方廣圓覺修多羅了義經導讀》補充講表

◎附表二十二

○第一難即執圓成以難遍計。第二難又執遍計以難圓成。實則依他不離圓成。

※《成唯識論觀心法要》卷八云：「所以一切大乘法門，皆令眾生即於現前諸法，強觀無

實。既知無實，便解如幻；既解如幻，便悟實性；既悟實性，方能從體起用。

夫強觀無實者，觀徧計也；解如幻者，觀依他也；悟實性者，根本智也；

從體起用者，後得智也。譬如以麻作繩，愚小無知，妄計為蛇。若不即從

所計之蛇，如實觀察，何由得知蛇本非有，故須蛇計既息，然後知繩即麻。

知即麻者，喻根本智；知麻可作種種大小諸繩，皆無實性，隨意所作，

喻後得智。故知《大乘止觀》、《成唯識論》觀心妙訣，曾無兩途。」

○善男子！諸旋未息，彼物先住，尚不可得……觀佛圓覺而不旋復。是故汝等，便生三惑。

◆諸旋：指前目動眼定雲駛舟行。未息者，言正動正定正駛正行時也。物先住者。言目正動，而水先不搖。眼正定，而火先不轉。雲正駛，而月先不運。舟正行，而岸先不移。尚不得者，應與感悖故。此約目前事件為能況，以顯下之無始心性為所況耳。

◆輪轉：顯是無始妄識，出生入死，起惑造業，莫不依之。故云：生死垢心。

◆曾未清淨：正在輪轉，如彼諸旋未息。圓覺即無始真性。觀此不旋復者，離於流轉，譬夫彼物先住。此亦應與感悖。彼既不得，此何能爾！故首置何況之言，謂何能況顯，令其相悖，成於應感，斷不能也。是知永出輪迴而辯圓覺，縱使辯得，亦非真圓覺性，以是非真知正見故。

◆三惑：決不得指見思塵沙無明之三種，的須指前伸難之「三疑」。其一疑惑以自語相違。次疑惑以世間相違，三疑惑以總成非量。若果是真知正見，則三種惑，何由而生。

◆諸旋未息，彼物不住，世間法尚且如此。何況六識不空，分別之妄相未息，生死輪迴之根本未出，而欲圓覺之不流轉，焉可得耶？以上建立答意。